



Te Kura Kaupapa Māori o
NGĀ MOKOPUNA

4 Te Awanui o Falkirk, Maraenui

Te Whanganui-a-Tara 6022

waea: 04 380 8966

Imēra: tari@tkkmmokopuna.school.nz

Pae tukutuku: www.tkkmmokopuna.school.nz

Pūrongo Tumuaki

Hui Kaihautū / Hui Whānau

#50/2026-27

22 Hōngongoi 2026

Kaupapa	Kōrero o te wā
Ngā Tamariki	Nō te tīmatanga o tēnei wahanga, e 150 (148) ngā tamariki kei tō tātou kura. Tāpiri atu ki te 150 ko te 28 kei Manawatū nā reira, a pepa nei, e 178 ngā tamariki kei te rārangi ingoa o Ngā Mokopuna i tēnei wā. Kia maumahara koutou e te whānau, hei te wahanga tuawhā, ka kōtahi anake te pōhiri mā ngā tamariki hou, ko te wiki tuatahi tērā. Tuarua, e taunaki nei a au kia kaua tātou e whakaae ki ētahi tamariki hou i te tīmatanga o te tau hou. Me tatari ra anō ki te tīmatanga o te wahanga tuarua. He aha ō koutou whakaaro?
Kura Hou Portacoms Wehenga Whā	E ai ki a Holmes Construction Ltd: • Kua whakatakotohia te papa raima matua mō paraka tahi. Ko te papa ūpoko i whakatakotohia i tērā wiki tonu (Rāpare 23/07/26). • Kua whakatūria ngā pou rino ki paraka rua • Hei te whā wiki (pea) whakatūria ai ngā pou rino ki paraka tahi • Hei te 4 o Here turi Kokā whakatakoto ai te papa raima ki te papa tuatahi o paraka rua • Ahakoa he paku tōmuri ērā mahi, kei te kī mai rātou (i tēnei wā) ka ū tonu ki te rā whakamutunga kua whakaritea (30 March 2027) Kua whakaae te Kaihautū kia puta wawe, tōmua mātou ngā kaimahi tari kia āhei rātou te turaki i ērā whare kia wawe te whakatakoto i ngā ngongo kawē waipara ka tau ki raro i te wāhi kei reira te tari inaianei. Ko te rautaki urupare ki tērā, ka whakatū ētahi whare kawē ki waho o te hōro hei kāinga rua.
Whare Tapere	Kei te whai tonu mātou i te MoE mō ngā kaupapa kua whakaraupapatia: • Me whai pakitara piki mā ngā tamariki • Me whai whakaaro mō tētahi tari mā ngā kaiako hākinakina, hauora • Whakarahi ake te rūmā hiki maitai hei akomanga hoki • Me whai tonu i te MoE, mā rātou ngā mea katoa e utu • Ko te korenga o te tōkeketanga i roto i ngā tau te take nui Ko tā māotu tāpaetanga ka tukuna ki te MoE i tēnei wiki tonu.
Hōtaka HauWai Tautāwhi Tamariki	Huro!!! Kua kitea tētahi tangata hei kaitiaki mō ēnei mahi ma tātou, ko Pāpā Tamatikahu Rātapu tērā. Nau mai, whakatau mai rā e Tamatikahu! He whakaraupapatanga mahi kua whakaritea e TRN mō te tūranga nei heoi, ko tā tātou ohu Hauora/Waiora ka arahi i a ia i roto i āna nei mahi. Ko tētahi whaingā matua māna, ko te whai huarahi ki te toro āwhina atu ki ngā tamariki katoa e hiahia ana kia eke rātou ki te tihi o tō rātou ake pūmanawatanga.
Te kura hei wāhi pōti	Kua whakaae te whānau ko te kura hei wāhi pōti mō te pōtitanga a motu ka tū hei te Whiringa a Nuku e kainamu mai nei. Mehemea he tangata o te whānau e wātea ana, e hiahia ana rānei te noho kei kaimahi (tūao nei) mō taua rā, whakapā mai. Ka tukuna te / ngā ingoa ki te kōmihana pōtitanga, mā rātou te hunga

	whakamutunga e whiriwhiri. Ka whakawhānuihia ēnei kōrero i tēnei pō. Me mahi moni tātou hei taua rā? Hoko atu i te parāoa rēwena? Hoko atu he kawhe, he tī, he tōtiti rorerore? Mahi moni mō tētahi haerenga?
Wehenga Tahī 2027	Kua kitea he wāhi mā tātou mō te tīmatanga o te tau hou kura 2027! Ko te kura katorika tawhito o St Bernards, Brooklyn, tērā. Kua timata ngā whiriwhiringa kōrero ki te kōmiti whakahaere o te kura rā me te MoE. Kāore e tāea te kī kua mau i a tātou te wahi rā hēoi, kua tirohia, ā, ahakoa ka kōpā rawa te noho tahi, he kāinga tērā mō te kotahi wahanga noa nā reira me ngākau mahaki tātou katoa! I te tau 2019 i whakatau tātou te whānau ka kore tātou e hoki mai ki kōnei tae ki wā kua whakatuwherangia ngā whare hou, ā, kei te ū tonu i tērā whakatau. He pūtea (\$50k) kua whakatapua e te MoE mō tēnei kaupapa. He tahua pūtea anō ka āhei tātou te whakamahi mō te kaupapa rā (SPG) me he take, e \$75k te rahi. Me whai i ētahi akomanga portacom (e rua, e toru pea) kia ahei te katoa te uru ki reira hēoi, he nui tonu ngā rangahau e noho tārewa ana i tēnei wā. Ko te manako ia ka ahei tātou tēnei kaupapa te whakamana hei te marama e tū mai nei.
Rarotonga 2027?	Ka pēhea o koutou whakaaro mehemea ka haere te katoa o te kura ki Rarotonga hei te tau e tū mai nei? Ko te whakaaro ia, kia whai i ngā tapuwae o ngā mātua tupuna. He tuatahinga tēnei, ehara i te mea me whakatau tātou i tēnei wā tonu ae rānei, kao rānei ka haere tātou.
Kura Reo 2026	Kei te whakaarohia ko te Wiki o te Reo Māori (14-20 Mahuru 2026) hei wā pai ki te whakatū i tā tātou Kura Reo mā ngā whānau o Ngā Mokopuna me ngā whānau o ngā kōhanga reo e toru e whāngai tamariki mai. Ko ngā whakaaro i tēnei wā: • Ka whakawhāiti ki te 80-90 tāngata anakē. (E 100 pea!) • Rāhina 14/09/26 - Hīkoi mō te Reo (Te Rā whakanui i te kawenga atu o te Pitihana mō te reo ki Paremata i te tau 1972), taone, nau mai, haere atu! • Rāpare 17/09/26 - Whakatau ki te kura (5pm-ish?) • Rāmere 18/09/26 - Rā tuatahi (he rā mā ngā kaiako anakē i te kura, ka kura kāinga ngā tamariki) • Rāhoroi - Hanarei 19-20/09/26 - te roanga o te wānanga. Ka kore pea e taea te tiaki tamariki i tēnei kura reo - nā te iti o ngā akomanga e wātea ana. He kaupapa kōrerorero tēnei mō tēnei Hui Whānau. Ko te rōpu whakarite e kōrerohia tonutia ana. Tāria te wā ka whakahoki kōrero mai ki te whānau whānui.
Ngā rā Kaiako Anakē	E toru ngā rā kaiako anakē karpīpiti e whakaarotia nei hei te takiwā o te Kura Reo. Tuatahi, hei te Rāmere (18/09) kia wātea ngā kaiako me ngā kaimahi katoa ki te tae atu ki te wānanga (hei kaimahi, hei ākonga rānei), ā, he te Rāhina me te Rātu whaimuri atu (21-22/09/26) kia āhei ngā kaiako me ngā kaiāwhina katoa o te kura tuatahi ki te tae a tinana atu ki tētahi kaupapa whakangungu a TRN mō te pāngarau me te reo Matatini. Me ako ngā tamariki i te kāinga mō aua rangi. Taunaki: Kia whakaae te whānau ki ngā rangi kaiako anakē e toru.
Ngā kaiako ākonga o te whānau nei	Tokorua ngā pāpā o tō tātou whānau ka timata hei kaiako ākonga ki tō tātou kura i tēnei wiki, ko Shannen Onekawa rāua ko Sjimmy Fransen ērā. Ko Shannen kei TWoR e ako ana, ā, ko Sjimmy kei Te Kunenga ki Pūrehuroa. Tokotoru anō ngā kaiako / kaiāwhina o te wā nei kei tā rātou wānanga i tēnei wiki ko Takerei, ko Te Ngawari, ko Hāpai ērā. Ko te manako ia, tokotoru anō ngā kaiāwhina ka whai tohu hei te tau e tū mai nei, ko Te Marie, ko Whaea Sylvia, ko Matua Matiu ērā.
He tono wānanga	Hei te 17-20 o Whiringa a Rangi 2026 tū ai te hui pōkai ao mō ngā rōpu rangahau iwi taketake. Ko te rōpū rangahau Māori o Aotearoa, Te Pae o te Māramatanga, e tautoko ana, e manaaki ana. He tono tāku kia whakaae te whānau kia haere atu ahau ki tērā o ngā hui, ekene pea hei kaikōrero anō hoki.

	Tuarua, he tono mā te kura taku rēhitatanga e utu. Ko te kaupapa kōrero e whakaarotia nei ko Te Kura Kaupapa Māori hei Tauranga Ātete. Taunaki: Kia whakaae te whānau kia haere te tumuaki ki te hui, ā, mā te kura te rēhitatanga e utu.
Whakamaumahara noa	
Te Karapu Poti o Te Puna a Tara - He kaupapa tiaki taiao moana	Kei te rapu tonu i tētahi tangata ki te tiaki me te arahi i te kaupapa o te Karapu Poti o Te Puna a Tara (Worser Bay Yacht Club). E whā ngā wahanga o te whanga e whakawhanake ana e te karapu, te kaunihera a rohe me te kaunihera o Pōneke anō hoki. I roto i aua wāhi e whā, e iwa ngā momo mahi rerekē kua whakaritea. Ko Whaea Kath Haines kei te Ohu Whakahaere o te kaupapa nei heoi, kei te rapu kaitiaki nō te whānau ki te arahi i a tātou mō te roanga o tēnei kaupapa. Ko koe tēnā? Mehemea ae, whakapā mai ki a au.
Kaitiaki mō ngā tamariki (haerenga a kura)	Ko tā te kura kaupapa here e pā ana ki ngā kaitiaki mō ngā haerenga a kura: 1. Mo ia tamaiti e whitu tau te pakeke heke iho rānei me 1:1 (kotahi te kaitiaki mō ia tamaiti) 2. Me 18 tau, pakeke atu rānei te kaitiaki 3. He pai kē atu mehemea he tangata kōrero Māori te kaitiaki 4. Ki te kore he tangata reo Māori, me mōhio te kaitiaki kia kaua ia e kōrero Pākehā i te taha o ngā tamariki. 5. Kaore e whakaaetia mehemea ko tētahi kaiako he kaitiaki - māna ngā tamariki katoa e manaaki, e arahi i roto i ngā mahi akoako, māna te tirohanga whānui. 6. Ki te kore e taea he kaitiaki, me noho kāinga tō tamaiti. Kua roa tēnei kaupapa here e mana ana e hoa mā heoi, ko ētahi whānau kāore tonu i te whai.
Ngā waea pūkoro	Ki te kawae waea pūkoro mai tō tamaiti ki te kura, me mau atu tērā ki te tari i tana taenga atu ki te kura. Kāore e whakaaetia ngā waea i ngā haora kura nā reira karekau he take kia mau i a rātou tā rātou waea. Mehemea ka mau tō tamaiti e whakamahia ana i tana waea - mo te hara tuatahi ka ngaro mō te rā. Mō te hara tuarua ka ngaro mō te wiki. Mo te hara tuatoru, ngā ngaro mō te wahanga! Ka mutu, ka whakahokia te waea ki tētahi mātua.
Te kōrerotia o te reo Māori	He kāhui tamariki [toko iti nei] he kaha nō rātou ki te kōrero Pākehā. Kia kaha koutou otirā tātou, tō tātou taiao reo Māori te tiaki. Hei te wiki e tū mai nei ka karanga hui ahau ki ngā mātua o aua tamariki ki te rongo he aha pea hei mahi mā mātou ki te āwhina i a koutou ngā whānau kia ū pai ki te reo Māori.
Taupānga AI	Kua kitea tētahi tauira o tētahi kaupapa here e hāngai ana ki te whakamahinga o ngā taupānga AI mā ngā ākonga, ā, ka tuari atu ki a koutou te whānau. A tēnā, koutou e mōhio ana mō ēnei tūmomo kaupapa, pānuitia, kōrerotia - he painga o roto mā tātou, he aha rānei? Kua kitea kētia e ngā kaiako wharekura e whakamahia ana e ētahi o ngā tamariki Wharekura heoi anō, kāore anō tātou te whānau kia kōrerotia. He aha ō koutou whakaaro? Ko te manako ia, ka āhei tātou tēnei te whakatau hei te Hui Whānau o te marama e tū mai nei.
Kaupapa Kai 2027	Kātahi anō te kāwanatanga ka whakaū te tahua pūtea mō ngā kai ki rō kura mō te tau e tū mai nei heoi anō, me aha tātou whai muri atu? He pai mehemea ka tīmata tēnei kaupapa te whakaaro ake kia matapakihia ngā kōwhiringa rautaki ma tātou haere ake. Mā tātou anō ngā kai e whakarite? Mā tētahi o te whānau rānei tēnei mahi? Me whakakahore rānei?

E haere ana	
Counselling Services (Kaimātai Hinengaro)	Kua timata anō ngā mahi a Whaea Mary-Jane Duffy hei kaimātai hinengaro, mā ngā tamariki, mā ngā whānau anō hoki, nō Kōwhai Therapeutics ia. Ki te pirangi tētahi whānau ki a ia mō tētahi tamaiti kura tuatahi, wharekura rānei, whakapā mai. Karekau he utu ki tētahi whānau mō tēnei mahi, ko te kura ka utua. He pūtea kua tonoa mai e Te Rūnanga Nui o nga KKM o Aotearoa mō tēnei tū momo mahi.
11 Ventnor	Ko tā māua ko Matua Reece Kōhatu inaianei, ko te whai i a Ngāti Tama, nō rātou tērā whenua. Ko te manako ia ka whakaae rātou kia āhei te MoE ērā whenua te rīhi hei kāinga mō tō tātou kōhanga reo.
Mahi tahi me VUW (Ratonga mātai hinengaro)	Kei te rangahau mātou i tētahi āheinga kua ara mai kia mahi ngātahi tātou te kura otirā, ngā whānau o te kura, me te wahanga mātai hinengaro o te Whare Wānanga o Te Herenga Waka, hei painga mā ngā tamariki. Nā te nui o te utu ki te whai aromatawai mātai hinengaro mā ngā tamariki, ko te whakaaro ia ka tukuna ngā tamariki (me te whānau) ki te ratonga kāhui mātai hinengaro o VUW, mā rātou te tamaiti e aromātaihia. Tuatahi, ka iti iho te utu, tuarua, ko te kura ka kawea tērā utu. He aha te kī e te whānau? Me whai tonu, kahore rānei? He kaupapa tēnei ka tukuna ki tā tātou Pou Tautāwhi ki te rangahau otirā, ki te whakarite i ngā hononga.
Tirohanga Whakamua	
Rā mutunga 11/12/2026	Ko te rā whakamutunga o te tau mō ngā tamariki ko te 11 o Hakihea. Hei te rā whakamutunga, ka tuku mihi ki ngā whare tawhito. He karakia, he mihi, he poro poroaki. Ka mutu, ka kai tahi tātou hei te 11am. Ka kore e kitea anō i ēnei whare tawhito! Ka timata hei te 9am, ka mutu te kura hei te pouputanga o te rā (12pm).
Wiki Hākinakina 13-18/12/2026	Ko te Wiki Hākinakina mā ngā tamariki wharekura o ngā KKM aho matua o te motu ka tū ki Heretaunga hei te wiki whakamutunga o te tau. Ko tā tātou tira ka noho ki TKKM o Te Ara Hou, Ahuriri. Ka noho tahi me TKKM o Te Rito heoi, ka tū motuhake e ia kura. Ka wehe i te ata o te Rātapu (13/12). Ka hoki hei te 18/12.
Tirotiro Niho	Kei te kōrero mātou ki te hunga tiaki i ngā niho a ngā tamariki mō te rautaki e pai ake ana mō te tau nei. Ka kawea ngā tamariki ki te whare niho kei Motu Kairangi hei te wahanga tuawhā. Ko te pēhea o tēnā e wānanga tonu ana. Taihoa!

Taunakitanga: Kia whakaaehia te pūrongo me ngā taunakitanga o roto.

Nāku noa

Dr Rāwiri Wright
Tumuaki